



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

23. Kalenderwoche – ab 4. Juni 2011

Bundesligareif

Dor CFC... - das is dor Gemnidzor Fußballclub! -... dähr is offgeschdieschn! Ja, aus dor vierdn in de dritde Liga! In dähn bezahldn Fußball! De Schbielor grischn also nu Gehald.

Isch weeiß gahr nisch, ob die vorhähr in dor driddn Liga fiehr umsonsd geschbiel ham. Odor ob die womeeschlich sogahr was bezahln mussdn, daderfiehr, dass in eim Vorein Fußball schbieln durfdn. Keene Ahnung!

Isch meene, wensde in eim Dennisvorein bisd, odor eim Gardnvorein, da mussde, wensde midmachn willsd, een Beidrach bezahln. Kennde sein, dass das in dor vierdn Liga ooch so gewähns is. Abor nu grischn se Gehald. Nu sin ooch de Gemnidzor Fußballor Profies!

Abor wo dud nu das Geld hährkomm, fiehr de Gehäldor? Da bin isch sähr geschbannd. Nee, bloß aus de Wärbeeinnahm un vom Eindriddsgeld wird da nischd! Da muss irschend e Schbonsor gefund wern!

Ginsdisch däde nu so eenor sein, wie dor Abramowidsch, dähr Schelsie London gekoofd had. Odor e Wiesdnscheisch Odor Gasbrom aus Russland. Odor so eenor, wie dähr Milljardähr, dähr Hoffnheim gekoofd had. Zur Nod däde ooch sowas gehn, wie Red Bull. Die sin ja iebrischens erschdema mid Leibzisch e bißl off de Nase gefalln. Nischd mid Offschdiesch! Nischd mid Durschmarsch in de Bundesliga! Wozu die nu jedzde schon das große Schdadion in Leibzisch gekoofd ham...? Nee, das mid "Flieschl vorleihn" had nisch geglabbd.

Nascha, fiehr dähn CFC däde villeischd ooch e Schbonsor gehn, dähr nisch gleisch in de Bundesliga noff will. Wobei - e Schbonsor dud nadierhlich bloß dann schbonsorn, wenn ooch e gewissor Wärbeeffeggd endschdehn dud. Un in dor driddn Liga... wo bloß ganz seldn ma Färnsähn dabei is... un bloß e baar hunnord Fenns... un die jedsma dieselm... un daderzu ziehmlische Banausn... - nee, isch gloobe, e guhdor Schbonsor dud erwardn, dass die dann weidor nach ohm noff marschiern. SOND duds ehm ooch keen rischdischn Wärbeeffeggd gähm.

Die von Red Bull, die wern jedzde weeschn Leibzisch beschdimmd een ziehmlischn Red Kobb ham - vor Ärschor, weil se nisch offgeschdieschn sin!

Jednfalls bin isch sähr geschbannd, währ sich dähn CFC nu koofn dud. Womeeschlich dud sich Red Bull die Sache midm CFC ma durschn Kobb gehn lassn?

Off alle Fälle had dor CFC dähn Offschdiesch gefeiod, wie sich das geheern dud - offm Markd! Ohm offm Balgong vom Radhaus hammse geschdandn un gegröld! Das ham ooch de Fußballmilljonähre von Dortmund nisch bessor gemachd, wo die de Meisdorschafd gefeiod ham. Also, so Liedor rumgröln un saufn un sich geeschneidisch mid Bier bekibbn, sowas heeßd "feiern" odor "Bardy machn"!

Nee, diesbeziechlich had dor CFC seine Bundesligareife durschau unnor Beweis geschdelld!

Eduard Sachsenmeyer